

2 TIMOZI

Warage Ween Ram Ayeedek Pól Timozi

1 ¹ Aneeta Pól o keen toonnyai o Yesu Kiristo eo arɔɔŋi Jooi ka kuuwayek ɔl roget o aterkedeket niini ageet ɲaati karomoneke Yesu Kiristo. ² Kayeedekin warage nico ineet Timozi o een ɲeeran o kareezin tuwenta. Abon bai anyin Jooi ween baatinai been Manyi ona Yesu Kiristo deten been ganɔn.

Anyek Pól Jook zany tuwente o Timozi

³ Kanyi zany Jook o kaliŋliɲonei naana nɔɔnɔ zinize ci vɔɔr kiyo baale buk agɔɔn jigitigane e. Kanyi gɔɔn naana nɔɔnɔ zany ɲaryiinta ɲaati kaadanin ineet tup baalinok ki waazinok. ⁴ Kaada gɔɔn tilalo ugun baal aluwekan aneet iiten baal kaɲerɔn e, ma karooŋ gɔɔn naana kicinin ineet ɔɔɔt ele ka katalɔ. ⁵ Kaada gɔɔn tuwen unun adɔi atobɔ ki tuwen o abetun Loyiz been yaatun Yuniz.

⁶ Zin giye nico karoŋnyin ineet zooti juruŋ liŋliɲon o Joowo baal anyin niini ineet iitene baal kataadekin azeeɛn ogan e. ⁷ Eeci Jooi alaŋ anyet ageet Vɔŋiz ci ka kanyakti ɲoliin, bar Vɔŋizi onine anyet ageet dɔyiz ki rɛɛzɔnet ki dɔyiz ci kagami eleeti.

⁸ Mǎ zin anyei alyaan ɲaati uwayne zɔɔz o Manyi onai, karabɔŋ bar een ɲaaten aneet o kacabje giye o kuuwaye kaviyak ogin. Bar abon buk apirna niina labak giye ci akati kaviyak o abon kiyo buk gɔɔn kapirna naana o. ɲaan anyin niini ineet dɔyiz tugu gi nico. ⁹ Orogozet niini ageet, ma otowawet ka kiziti ɔl cigin abon. Alaŋ een zin bar kaale ci abon kagɔɔn naaga, bar olla agɔɔn gi nico labak niini doon bonate onin gole ci arek niini baale laadun ɲaan ketɛɛnyai lɔɔci e ka korogozet niini ageet ɲaaten Yesu Kiristo. ¹⁰ Iiya zin inoko eyelizayet niini ageet deten nico ɲaaten Yesu Kiristo ween ruguzoi onai. Iiya omogun niini daayiz, ma anyaa roget o abil been neen ɲaaten kaviyak o Joowo abon. ¹¹ Eɲerawan zin Jooi aneet kizi toonnyai ci kuuwai kaviyak ci abon noko, ma kademzei ɔl. ¹² Zin giye nico mayo nuun kagide naana kiyo kagide noko, alaŋ kanyei alyaan, eeci kaga naana Yesu Kiristo o katu naana nɔɔnɔ, ma kaga naana ɲaan azooni niini liŋliɲon onin ɲaaten aneet zɛɛ been iiten ci katin abadaan niini e.

¹³ Meda zin zooti zɔɔz ween didi baal kademzekin e tuwenta been reezonte o kanyak naaga giye o koromtozeke Yesu Kiristo. ¹⁴ Zooti zɔɔz ci Joowo titiny baal anyonekin ineet o juruŋ dɔyize o Vɔŋiz o Joowo aavi ɲaatinai.

¹⁵ Aga niina ɔl o tuwento dook looce o kazi Asiya ɲaato otɔŋteyan looc calaŋ atiritan. Meen nuun awɔyi Vijiloz been Irmojanis ɔɔɔɔɔ buk niigi otɔŋteyan aneet looc. ¹⁶ Abon zin amayuk Manyi ɔl ci ceez o Onesivoras, eeci gɔɔn atiritan niini aneet, ma anyan katalɔ lak ci meel. Ma alaŋ niini anyak alyaan giye o kacabine. ¹⁷ Bar iiten baal akunake niini Rom e, iiya ɔɔɔŋan aneet enice ele zɛɛ makacin ojowawan. ¹⁸ Abon bai anyek Jooi nɔɔnɔ deten iitene ci katin abadaan Yesu e. Aga ri buk niina kaal o abon dook baal agoonekan niini aneet kuture o kazi Evesos e.

Gam ziniz kɔɔk gidente o agidin ɔl

2 ¹ Zin niina Timozi o een ɲeeran tuwenta, meda dɔk bonate onai anyet Yesu Kiristo ageet. ² Gam zɔɔz o Joowo baal gɔɔn aziɲnan niina aneet kuuwawei kɔle e. Demezek buk zoozok nicoko ɔl o aga niina iimi nɔɔɔgɔ zinzeeti, ma anyak tuwen juruŋ, ka buk niigi gɔɔn kɔɔt kedemzetek zoozok nicoko gɔɔnɔgi oogi.

³ Pira buk niina kiyo gɔɔn naana o. Mez piryakzet. Anyek ziniz kɔɔk ka izi takiren ci Yesu Kiristo een didi. ⁴ Eeci ɛti ci izi takiren alaŋ bodo niini arek ziniz kaalyan ci ɔl o alaŋ een takirnya, bar arek niini ziniz liŋliɲon onin takirzetu, ma aliŋliŋ juruŋ ka katalɔ alaani onine nɔɔnɔ. ⁵ Bilɔ niina kiyo ɛti o tiir ajaar gɔɔnɔgi ka kanycek ɔl nɔɔnɔ vɔyit o viranto o. Gɔɔn zin buk eet ci ajaar gɔɔnɔgi iinyaye oogi alaŋ anyononek vɔyita, dooke coma azooni niini lotinok o aduwak ɔl nɔɔɔgɔ maŋaan kodokonyit e. ⁶ Bilɔ buk niina kiyo ɛti o gɔɔn eevyi ɔɔɔt o. Eeci ɛti ci eevyi ɔɔɔt aɔdowa niini labi ci meelik ɔɔɔt. ⁷ Baaban zin keŋti ci zoozok cigan kaduwakin noko. ɲaan anyin Manyi ineet genyiz ci agawe nɔɔɔgɔ juruŋ.

⁸ Baaban gɔɔn Yesu Kiristo. Niini dole ci dɔl o Devid. Itiŋawi Jooi nɔɔnɔ daayiza kiyo gɔɔn kuuwaye naana ɔl kaviyawe o abon o. ⁹ Zin giye o kuuwaye naana kaviyak o abon, ipirtayan ɔl zɛɛ ma acabjan nyaramramete kiyo keen libjoi o. Bar zin zɔɔz o Joowo alaŋ acabje been neen. ¹⁰ Gi o zin gɔɔn kameze naana kaal ci kapirname dook o neen, ka ɔl o Joowo aɲeryai kojokta buk niigi roget o abil been neen o aku ɲaaten Yesu Kiristo, ka koromte niigi ki nɔɔnɔ titinyonte onin nɔkɔ been neen. ¹¹ Aleem zin didi zɔɔz o aduyai azi ne, “Mǎ kadaai ki nɔɔnɔ, karogi buk bodo tiɲeere naaga kibeen nɔɔnɔ. ¹² Mǎ kamena kamez gidɛn o kagiden, kavɔ buk koca tiɲeere kabal naaga been nɔɔnɔ kaal dook. Mǎ kadaŋ naaga nɔɔnɔ, adaŋnyet buk tiɲeere niini ageet. ¹³ Mayo nuun gɔɔn alaŋ kazooni naaga zoozok ogaac kaduwa o, amena niini agooneket ageet kaal o aterkedeket dook, eeci niini alaŋ anim kadaŋ kaal o ele onin maany.”

Bonat o arɔɔŋ Jooi

¹⁴ Duwak zin ɔl cugun o kaal nicoko juruŋ. Ricanek nɔɔɔgɔ ɲume o Joowo ka calaŋ adaŋɔ, eeci daŋon alaŋ atirit ɔl, bar abakbayen ɔl o aziirar nɔɔɔgɔ. ¹⁵ ɔɔɔnɔŋ liŋliɲozek Jook juruŋ ka izi niina gabaren cin abona ɲume onin, ma akɔmnin ineet alyaan liŋliɲonte unun. Ma ademzei ɔl zɔɔz o Joowo een didi gole ci abil tɔp.

¹⁶ Deyai niina daŋonowe o tarbal gɔɔn anyek ɔl kedeyai Joowa. ¹⁷ Ma zoowowa cigeec voloŋo ademzek niigi ɔl noko, ɛel kiyo dɔkizeci o gɔɔn adɔt eet ele, ma alaŋ alal o. Mazin ci agɔɔn kaal nicoko o Emaniyas ki Viletos. ¹⁸ Otoŋit niigi zɔɔz o Joowo een didi, ma iziriranit tuwen ci ɔl oogi ole o atuwe giye ci ane niigi ne, “ɲaazi daayiza iiya baale odota. Akɔma bodo ɲaazi daayiza ci ka kiiya katin.” ¹⁹ Bar zin zoowowa o Joowo een didi ɛel kodoyit kak ɔɔɔt calaŋ amot. Ma azi zɔɔz nici ne, “Aga Manyi Yesu ɔl ogin.” Ma bodo azi ne, “ɔl dook o azi ne, Eegin niigi ɔl ci Joowo, abon adeyai niigi kaale o ger.”

²⁰ Gɔɔn ɛti ceen aroi anyak niini ceenze cin kodooce been ijunya ci meel aɲɔɔwɔ keŋti. Ogen ɛenycai warkine ki zurtenene. Ogen agɔɔnnyai tɔɔwɔi ki keeni. Ma aliŋliŋi ɔl kaal nicoko oogi ɲaatineŋ liŋliɲonok ci celbez labak, maje o titiny ɲaatineŋ aliŋliŋi ɔl nɔɔɔgɔ kaal o titiny. ²¹ Nici zin gi ci ayabzoneket ageet. Naaga ɔl o katu Jook, keel kiyo kaal nicigi o. Abon anyek ɛti ziniz kitiliza kaale dook ka kotobto niini ki kaal o ɛenycai warkine been zurtenene ka kililŋliŋ niini liŋliɲon o Joowo titiny doon, eeci anyewun niini ele onin Jook, ma itiliza nɔɔnɔ ziniz, ma abilnek niini liŋliɲonok o abon doon. ²² Dewa zin ele kaale gɔɔn arɔɔŋ

lógòz o ñaan avóhnyai, bar niina wóronj tugu kaal ci abon. Zooti tuwen ki reezonet ki ganon ole o tuwento juruj. Romek niina ele ol o góon awo Jook zinzeetine ci wóor ka kitirit niini nógó.

²³ Dewa ele ñanonowe o ger tarbal, eeci góon ñanonowa nici anyaa jorenen tup. ²⁴ Alañ gabarenti ci Joowo agano ñaati adañon kibeem ol. Bar abon niini atibez ole dook, ma ademez ol zinize ci alal. ²⁵ Abon atibez ñaati iloti niini ol o amarnin gól o Joowo. Karabon iima anyek Jooi nógó gól ci abadi mony onene ugeec, ma aga zóoz ween didi, ²⁶ ma abadaan ooti ugeec juruj ka keteedoi baabaninok o Loryento ger baal acap nógó, ma adañek kutuguzó kaal o aróonj niini e.

Kaal o agóon ol o gerze

3 ¹ Abon zin aga gi ce juruj. Tiñeere iinyaye ci ka koortei e akanai kaalyana ci gerze óróot ele. ² Eeci tiñeere areez ol eleeti ugeecik doon, ma appinte zinzeeti, ma abólól, ma adonj eleeti, ma amomoz gónógi oogi, ma alañ azii zoosok ci baatigeec ki yaatigeec, ma apez kaal o abon agoonek ol nógó, ma abor Jook. ³ Ma azeei nógó zinzeeti, ma gidaje zinzeeti, ma ańomót ol gerze tup, ma avaraciz, ma apan ol gaga, ma abor kaal o abon. ⁴ Ma alabek niigi ol ugeec ele tuu, ma anyak bolñac ci aborni nónj taman nókó, ma areez ñaati adonj eleeti, ma areez madiz o kaal o loocu, ma bar abor Jook. ⁵ Agóon niiga eleeti kizi ol ci Joowo, maje ñaato adañ ñoyiz o Joowo. Deyai zin niina ole ci eel kiyo nici o, ⁶ eeci góon ol nicoko ogen ñaatineen avó korogjowe culu, ma avó alaba ñaai o bakbai zinzeeti o abaaban niigi tup nókó onje ugeec, ma aróonj zinzeeti ugeec kaal ci meelik kenji ger. ⁷ ñjedet góon ñaai nici aróonj demziin tup nókó, bar zin azii niigi demziinok ci gaga, ma alañ anim kagaac demziinok o Joowo een didi. ⁸ Ol nicigi abor niigi zóoz ween didi kiyo baale abor eeti o kazi Janis been Jambaris Mosis e. Uulalte nógó ooti ugeec, ma uulalit buk niigi tuwen uneen. ⁹ Alañ zin tiñeere niigi amena ñinti reen, eeci tiñeere ol dook acin aliyakzet cineenj noko kiyo baale acin ol zóoz ci eet o kazi Janis been Jambaris baal abor Mosis e.

Ilot Pól Timozi ka kemedak tuwen onin

¹⁰ Bar zin niina agawu demziin onan, ki baayiz onan, ki gól o karonj naana rogete onan. Atańaameyu ri niina tuwen been ziniz laliz onan, kibeem reezinet been ñoyiz onan kameze kaal o ger acinanan. ¹¹ Icinu ri niina giden onan. Aga ri niina giden o appe óróot baal agidan ol o kuturyok o kazi Antiyok ki Ikoniya been Litra e. Bar zin waanice orogozan Manyi aneet gidenowe niceke dook. ¹² Mazin laadun ol dook o aróonj kabaayito baayiz o Joowo giye o oromtozeke niigi Yesu Kiristo, ajowa niigi giden loota ñina óróot.

¹³ Maje ol o gerze kibeem ol o góon alaba gónógi, tiñeere amena azaaci gerzitin cineenj o óróot. Ma alaba niigi ol oogi, ma bodo buk alabajai niigi alya. ¹⁴ Bar zin niina medak demziin ween didi baal edemezu, ma utuwu juruj e, eeci aga niina ol baal ademezin ineet e awó zóoz uneenj tó. ¹⁵ Ma aga buk niina warage o Joowo iinyaye baal ñaan eene kidic e. Nóonó neen o anyin ineet genyiz o ajowane niina roget o abil been neen giye o utuwe niina Yesu Kiristo. ¹⁶ Ma warage o Joowo dook ayeedjai ñoyize onin, ka kedemez ol zóoz ween didi, ma agernyek nógó baciinowe ugeec, ma ilot nógó kabaayito baayiz ci abon. ¹⁷ Ka kedemezek eet ci alinjónok Jook genyiz ci ka kutuguwi kaal o abon dook.

4 ¹ Karicanekin zin naana ineet ñume o Joowo been Yesu Kiristo o ka kabada katin kiiya kapak ol o arogi been ol o adaayito dook iitene ci akuni niini ka kiiya kabali ol alazete onine. ² Uuwayek ol zóoz o Joowo iinya dook. Yo nuun atalna niigi demziin cun o, karabonj alań atalna, uuwayek niina nógó labak. Gerenyek nógó kaale o ger. Tilo nógó. Diziyek nógó zinize ci alal. ³ Eeci katin aku iitene calañ aziñni ol demziin ween didi, ma bar ano niigi kaal o aróonj nógó zinzeeti ugeec. Ma ańera niigi ol ci meel ñaatineen ka kedemezek nógó demziin ci agano ki kaal o areez niigi. ⁴ Abor tiñeere niigi ñaati aziñni demziin ween didi, ma bar avó azii ñatanaridet. ⁵ Ma zin niina abon agam ele cuno juruj tup. Mez kaal o agidin ol ineet. Lijñijñijñon o gabaren o abon o uuwak kaviyak o Joowo abon.

⁶ Maje naana alańaan bodo karugi ñinti wun, eeci iiya iitene o ka kanyozozeke naana Jook kiyo todoyoiti o. Inoko zin izi ajón. ⁷ Zin naana kóoranonj óróot zinize onan dook. Kidica lijñijñon onan baal arońekan Jooi aneet kutugu loota ñina e dook, ma kozoote tuwen onan ñaaten Yesu Kiristo. ⁸ Inoko zin kaga naana areyan Jooi aneet woyit cigan tammu tadena giye o kabonane naana ñume onin. Aruwekan tiñeere Manyi o apak kaal juruj woyit cigan o iitene ci payiinto e. Alañ zin bar niini akó anyan woyit aneeta doon, bar buk anyek ol dook o are kuni onin reezinta.

Aróonj Pól Timozi kiiya

⁹⁻¹⁰ Timozi, inoko karonjñin ija. Iyiyi kataman, eeci Demas imiurozek nóonó ziniz kaal ci loocu noko, ma otońeyan looc óróot ook Tesalonika. Buk Keresenis óróot ook Galatiya, maje Titos óróot ook Dalmatiya. ¹¹ Koromtewa ñaato kibeem Luka doon. Inoko zin ma akun, orkorya kibeem Marko ka kiiya kitiritan niini aneet lijñijñonta. ¹² Inoko zin kitoona Ticikos kook ñaatonoonj ka ma akun niina, ka kirigiz niini ñino lijñijñon unun Evesosa ñinaante. ¹³ Mazi akun, zótayan rum onan malkinto baal kooñnei eet o kazi Karpas kuture o kazi Toras e. Jai buk waragenya ogan, ricik óróot waragenya ween ruce.

¹⁴ Buk bodo Alikzandar o góon adeedi utuguweyan kaal ci ger óróot ele. Ñaan zin acin nóonó Jooi doon kaale ci agoonekan niini aneet noko. ¹⁵ Zooti zin niina alya ele ñaatin, eeci amarnin niini zóoz cinai kuuwak o óróot ele.

¹⁶ Iitene baal kaave roonnye o oowu Roma ñaato e, odoteyan lańotigane dook looc, kókóm codoi aku kiiya kitiritan zóza. Abon bai oonj Manyi nógó calañ aada gi ci baal adotekan niigi aneet looc o. ¹⁷ Zin waanice Jook neen o karomena been aneet, ma anyan niini aneet ñoyiz ci kóobe zóoz onin juruj ka kiziyit ol ween moden dook. Ma eelawan niini aneet roonnye nice calañ apawonekan daayizi kiyo eeti o eelyai maat utugetine o. ¹⁸ Zin kaga naana ñaan tiñeere Manyi amena eelanan aneeta kaale o ger dook nókó zee ma akoyan baliinte onin tammu tadena. Abon bai kadiññan naaga nóonó nókó kodot. Nóonó neen.

Azaa Pól ol

¹⁹ Zaaweyan zin Parsila been eet onin kazi Akila been ol o tatok o Onesivoras. ²⁰ Aavu Erastus kuture o kazi Korintiya, maje Tovimas kooñnei kutur o kazi Miletus, eeci amóor. ²¹ Abon zin niina akun taman ińaan kóon tammu o. Azaayin zin Ebolos ki Pubenis ki Lainos ki Kolodiya been gotonogu o atuwe dook ineet. ²² Abon bai Manyi aavi zinize unun. Ma abon abil deteni o Joowo ñaaten igeet dook.